

79 至莫府，廣謂其麾下曰：「廣結髮與匈奴大小七十餘戰，今幸從大將軍出接單于兵，而大將軍又徙廣部行回遠，而又迷失道，豈非天哉！且廣年六十餘矣，終不能復對刀筆之吏。」遂引刀自剄。廣軍士大夫一軍皆哭。百姓聞之，知與不知，無老壯皆爲垂涕。而右將軍獨下吏，當死，贖爲庶人。

83 廣子三人，曰當戶、椒、敢，爲郎。天子與韓嫣^(一)戲，嫣少不遜，當戶擊嫣，嫣走。於是天子以爲勇。當戶早死，拜椒爲代郡太守，皆先廣死。當戶有遺腹子名陵。廣死軍時，敢從驃騎將軍。廣死明年，李蔡以丞相坐侵孝景園墼地，^(二)當下吏治，蔡亦自殺，不對獄，國除。李敢以校尉從驃騎將軍擊胡左賢王，力戰，奪左賢王鼓旗，斬首多，賜爵關內侯，食邑二百戶，代廣爲郎中令。頃之，怨大將軍青之恨其父，^(三)乃擊傷大將軍，大將軍匿諱之。居無何，敢從上雍，^(四)至甘泉宮獵。驃騎將軍去病與青有親，射殺敢。去病時方貴幸，上諱云鹿觸殺之。居歲餘，去病死。^(五)而敢有女爲太子中人，愛幸，敢男禹有寵於太子，然好利，李氏陵遲衰微矣。

(一) [案] 或音僂，又音許乾反。

(二) [案] 墼音人絹反，又音乃段反，又音而宜反。案：墼地，神道之地也。黃圖云：「陽陵關門西出，神道四通。」茂

91 陵神道廣四十三丈」也。 [正義] 漢書云：「詔賜冢地陽陵，當得二十畝，蔡盜取三頃，頗賣得四十餘萬，又盜取

神道外墼地一畝，葬其中。當下獄，自殺。」

(三) [案] 小顏云：「令其父恨而死。」

(四) [案] 劉氏音尙。大顏云：「雍地形高，故云上。」

(五) [案] 集解徐廣曰：「元狩六年。」

92 李陵既壯，選爲建章監，監諸騎。善射，愛士卒。天子以爲李氏世將，而使將八百騎。嘗深入匈奴二千餘里，過居延^(一)視地形，無所見虜而還。拜爲騎都尉，將丹陽楚人五千人，教射酒泉、張掖以屯衛胡。

(一) [集解] 徐廣曰：「屬張掖。」 [正義] 括地志云：「居延海在甘州張掖縣東北六十四里。地理志云：『居延澤古文以爲流沙。』甘州在京西北二千四百六十里。」

94 數歲，天漢二年秋，貳師將軍李廣利將三萬騎擊匈奴右賢王於祁連天山，^(二)而使陵將其射士步兵五千人出居延北可千餘里，欲以分匈奴兵，毋令專走貳師也。陵既至期還，而單于以兵八萬圍擊陵軍。陵軍五千人，兵矢既盡，士死者過半，而所殺傷匈奴亦萬餘人。且引且戰，連鬪八日，還未到居延百餘里，匈奴遮狹絕道，陵食乏而救兵不